

Kobra'n ta Nada; Traha Te Kos!

Segun dokumentonan ofisial di gobièrnu merikano, un señora na New York ta mama di 73 yu! Talbes e dama aki a bati e rekòrt--pero no e rekòrt pa e mama ku mas tantu yu; ma e rekòrt pa froude di ònderstand. E muhé aki, usando 15 diferente nòmber, inkluiendo Shirley, Jane, Patricia, i Celeste, a duna lus na 73 yunan fiktisio. Falsifikando sertifikadonan di boutismo, el a logra estafá fl. 800.000.

No ta rasonabel pa pensa ku un pèrsona ku tantu inteligensia ku el a logra plùnder fl. 800.000 di gobièrnu por mester tin suficiente kapasidat mental pa traha--i pues no mester ta kobrando ònderstand mes?

Vários klase di hende ta bin na remarke pa kobra ònderstand. Algun, pa un òf otro motibu, simplemente no tin e abilidad òf pusibilidad pa traha. Nos tur tin kompreshon i kompashon pa hende ku ta haña nan den un situashon asina. Ma e kobradónan di ònderstand ku tin nos kansá, tantu na nos islanan komo na Hulanda, ta esnan ku tin abilidad pa traha, ma ta nenga. Nos ta apoyá medidanan kontra kobramentu di ònderstand den kasonan aki.

Pobresa por tin vários origen. Algun hende ta haña nan den flakesa finansiero pa motibu di sirkunstansianan EKSTERNO, manera diskriminashon, falta di oportunitat, tragedia, sueldo demasiado abou. Ma awendia, talbes e gran mayoria di pobresa na nos islanan ta resultado di komportashon ku tin su rais den aktitutnan INTERNO. Den kasonan asina, pobresa ta e resultado di un sistema di bida ku e pèrsona mes a skohe: kasonan manera embraso hubenil, kita for di skol, adikshon na droga òf alkohòl, krimen. Pa kolmo, hopi bes ta nèt e Sistema di bida aki ku ta destruí e motivashon pa traha.

E mihó solushon pa trata ku kasonan asina ta e plan simpel, introdusí den Hòfi di Eden: kada adulto bon di salú mester traha pa su pan di kada dia. Asta ora hende tabata den un estado pèrfèkto, Dios a duna nan trabou pa hasi (Génesis 2:15). Despues ku Adam i Eva a hasi piká, Dios a bisa Adam, "ku sodó di bo frenta lo bo kome pan" (Génesis 3:19). Pues, traha pa kome.

Ta interesante pa nota Dios Su instrukshon na Israel den Tèstament Bieu tokante e manera ku nan por a yuda e pobernan den nan komunidad. El a spesifika ku den tempu di kosecha, kunukeronan no mester kosechá te na rant i skina di e kunuku, ni piki loke a keda atras òf loke nan a lubidá (Levitiko 23:22). Igualmente, nan no mester a piki drùif ku a kai òf pasa pa di dos bes pa piki drùif ku a keda tras despues di kosecha (Deuteronomio 24:19-22). Motibu pa esaki tabata pa e pobernan por haña algun drùif pa piki i kome. Ripará ku Dios no a preskribí un donashon pa e pobernan. Alkontrario, nan mester a traha pa nan por kome.

Skritura ta kategoriko riba e punto aki. 2 Tesalonisensenan 3:10 ta deklará enfátikamente, "si un hende no ke traha..e no kome tampoko." Nos Kreador no tin un kurason duru. El a duna e instrukshon aki pasobra E sa ku un donashon sin obligashon ta degradante. Trabou ta produsí rèspèt propio. Irespekto di su situashon finansiero, un hende lo sintié mas kontentu si e por hasi un kontribushon pa loke e ta gasta.

Nos tambe por eksigí esnan bon di salú ku ta kobra ònderstand pa hasi un òf otro forma di trabou den nos komunidad. Di e manera aki nan no solamente lo gosa di e dignidat di hasi trabou, ma nan tambe lo por hasi un kontribushon balioso na nos komunidad. Dependiendo di e pèrsona i e kaso, nan sikiera por dediká vários ora den un siman pa piki sushi, fèrf, kose, limpia, èts.

Pa duna ònderstand gratuitamente sin eksigí trabou, ta krea un aktitut irresponsabel. Nos ta hasi esnan ku nesesidat den nos komunidad bira resipientenan pasivo, na lugá di duna nan e privilegio di hasi trabou util. Nos no mester ignorá nan abilidadnan i talentonan. Si nan por traha i nan talentonan no ta ser kanalisá pa hasi trabou konstruktivo, posibelmente nan lo usa esaki pa aktividatnan destruktivo òf ilegal...manera e muhé di New York ku a logra inventá 73 yu!